

南齊書

卷一
八冊

南齊書

PDG

南齊書卷三十七

列傳第十八

到攜

劉俊

虞棕

胡諧之

到攜字茂謙彭城武原人也祖彥之宋驃騎將軍父仲度驃騎從事中郎攜襲爵建昌公起家爲太學博士除奉車都尉試守延陵令非所樂去官除新安王北中郎行參軍坐公事免除新安王撫軍參軍未拜新安王子鸞被殺仍除長兼尙書左民郎中明帝立欲收物情以爲功臣後擢爲太子洗馬除王景文安南諮議參軍攜資籍豪富厚自奉養宅宇山池京師第一妓妾姿藝皆窮上品

才調流瞻善納交遊庖廚豐腆多致賓客愛妓陳玉珠明帝遣求
不與逼奪之搗頗怨望帝令有司誣奏搗罪付廷尉將殺之搗入
獄數宿鬚鬢皆白免死繫尙方奪封與弟賁搗由是屏斥聲玩更
以貶素自立帝除搗羊希恭寧朔府參軍徙劉韞輔國王景文鎮
南參軍竝辭疾不就尋板假明威將軍仍除桂陽王征南參軍轉
通直郎解職帝崩後弟賁表讓封還搗朝議許之遷司徒左西屬
又不拜居家累年弟遁元徽中爲寧遠將軍輔國長史南海太守
在廣州昇明元年沈攸之反刺史陳顯達起兵以應朝廷遁以猶
豫見殺遁家人在都從野夜歸見兩三人持堊刷其家門須臾滅
明日而遁死問至搗遑懼詣太祖謝卽板爲世祖中軍諮議參軍
建元初遷司徒右長史出爲永嘉太守爲黃門郎解職世祖卽位
遷太子中庶子不拜又除長沙王中軍長史司徒左長史宋世上

數遊會爲家同從明帝射雉郊野渴倦搗得早青瓜與上對剖食
之上懷其舊德意眄良厚至是一歲三遷永明元年加輔國將軍
轉御史中丞車駕幸丹陽郡宴飲搗恃舊後狎侮同列言笑過
度爲左丞庾杲之所糾贖論三年復爲左長史轉左衛將軍
隨王子隆帶彭城郡搗問訊不脩民敬有司所舉免官久之自
衣兼御史中丞轉臨川王驃騎長史司左長史遷五兵尙書出
爲輔國將軍廬陵王中軍長史母憂去服未終八年卒年五十
八弟賁初爲衛尉主簿奉車都尉昇明初爲中書郎太祖驃騎諮
議建元中爲征虜司馬卒賁弟坦解褐本州西曹昇明二年亦爲
太祖驃騎參軍歷豫章王鎮西驃騎二府諮議坦美鬚髯與世祖
豫章王有舊坦仍隨府轉司空太尉參軍出爲晉安內史還又爲
大司馬諮議中書郎卒

劉俊字士操彭城安上里人也彭城劉同出楚元王分爲三里以別宋氏帝族祖穎之汝南新蔡二郡太守父勔司空劉延孫爲南徐州初辟俊從事隨父勔征竟陵王誕於廣陵以功拜駙馬都尉轉宗慤寧蠻府主簿建安王司徒騎兵參軍復隨父勔征殷琰於壽春於橫塘死虎累戰皆勝歷遷員外郎太尉司徒二府參軍代世祖爲尙書庫部郎遷振武將軍蜀郡太守未之任復從父勔征討假寧朔將軍拜鄱陽縣侯世子轉桂陽王征北中兵參軍與世祖同直殿內爲明帝所親待由是與世祖款好遷通直散騎侍郎出爲安遠護軍武陵內史郡南江古堤久廢不緝俊脩治未畢而江水忽至百姓棄役奔走俊親率厲之於是乃立漢壽人邵榮興六世同爨表其門閭俊強濟有世調善於流俗蠻王田儻在山中年垂百餘歲南譙王義宣爲荊州儻出謁至是又出謁俊明帝崩

表奔赴敕帶郡還都吏民送者數千人悛人人執手係以涕泣百姓感之贈送甚厚仍除散騎侍郎桂陽難加寧朔將軍助守石頭父勔於大桁戰死悛時疾病扶伏路次號哭求勔屍勔屍項後傷缺悛割髮補之持喪墓側冬月不衣絮太祖代勔爲領軍素與勔善書譬悛曰承至性毀瘠轉之危慮深以酸怛終哀全生先王明軌豈有去縑纈徹溫席以此悲號得終其孝性邪當深顧往旨少自抑勉建平王景素反太祖總眾軍出頓玄武湖悛初免喪太祖欲使領支軍召見悛兄弟皆羸削改貌於是乃止除中書郎行宋南陽八王事轉南陽王南中郎司馬長沙內史行湘州事未發霸業初建悛先致誠節沈攸之事起加輔國將軍世祖鎮益城上表西討求悛自代世祖旣不行悛除黃門郎行吳郡事尋轉晉熙王撫軍中軍二府長史行揚州事出爲持節督廣州廣州刺史將軍

如故襲爵鄱陽縣侯世祖自尋陽還遇悛於舟渚閒歡宴敘舊停
十餘日乃下遣文惠太子及竟陵王子良攝衣履脩父友之敬太
祖受禪國除進號冠軍將軍平西記室參軍夏侯恭叔上書以柳
元景中興功臣劉勔殞身王事宜存封爵詔曰與運隆替自古有
之朝議已定不容復厝意也初蒼梧廢太祖集議中華門見悛謂
之曰君昨直邪悛荅曰僕昨乃正直而言急在外至是上謂悛曰
功名之際人所不念卿昔於中華門荅我何其欲謝世事悛曰臣
世受宋恩門荷齊眷非常之勲非臣所及進不遠怨前代退不孤
負聖明敢不以實仰荅遷太子中庶子領越騎校尉時世祖在東
宮每幸悛坊閑言至夕賜屏風帷帳世祖卽位改領前軍將軍中
庶子如故征北竟陵王子良帶南兖州以悛爲長史加冠軍將軍
廣陵太守轉持節都督司州諸軍事司州刺史將軍如故悛父勔

討殷琰平壽陽無所犯害百姓德之爲立碑祀悛步道從壽陽之
鎮過勛碑拜敬泣涕初義陽人夏伯宜殺剛陵戍主叛渡淮虜以
爲義陽太守悛設計購誘之虜關州刺史謝景殺伯宜兄弟北襄
城太守李榮公歸降悛於州治下立學校得古禮器銅罍銅甗
山銅罍樽銅豆鍾各二口獻之遷長兼侍中車駕數幸悛宅宅盛
治山池造甕牖世祖著鹿皮冠被悛毳皮衾於牖中宴樂以冠賜
悛至夜乃去後悛從駕登蔣山上數歎曰貧賤之交不可忘糟糠
之妻不下堂顧謂悛曰此況卿也世言富貴好改其素情吾雖有
四海今日與卿盡布衣之適悛起拜謝遷冠軍將軍司徒左長史
尋以本官行北兗州緣淮諸軍事徙始興王前軍長史平蠻校尉
蜀郡太守將軍如故行益州府州事郡尋改爲內史隨府轉安西
悛治事嚴辦以是會旨宋代太祖輔政有意欲鑄錢以禪讓之際

未及施行建元四年奉朝請孔覲上鑄錢均貨議辭證甚博其略以爲食貨相通理勢自然李悝曰糴甚貴傷民甚賤傷農民傷則離散農傷則國貧甚賤與甚貴其傷一也三吳國之關閭比歲被水潦而糴不貴是天下錢少非穀穰賤此不可不察也鑄錢之弊在輕重屢變重錢患難用而難用爲累輕輕錢弊盜鑄而盜鑄爲禍深民所盜鑄嚴法不禁者由上鑄錢惜銅愛工也惜銅愛工者謂錢無用之器以通交易務欲令輕而數多使省工而易成不詳慮其爲患也自漢鑄五銖錢至宋文帝歷五百餘年制度世有興廢而不變五銖錢者明其輕重可法得貨之宜以爲宜開置泉府方牧貢金大興鎔鑄錢重五銖一依漢法府庫已實國用有儲乃量奉祿薄賦稅則家給民足頃盜鑄新錢者皆效作翦鑿不鑄大錢也摩澤淄染始皆類故交易之後渝變還新良民弗皆淄染不

復行矣所鬻賣者皆徒失其物盜鑄者復賤買新錢淄染更用反覆生詐循環起姦此明主尤所宜禁而不可長也若官鑄已布於民使嚴斷翦鑿小輕破缺無周郭者悉不得行官錢細小者稱合銖兩銷以爲大利貧良之民塞姦巧之路錢貨旣均遠近若一百姓樂業市道無爭衣食滋殖矣時議者多以錢貨轉少宜更廣鑄重其銖兩以防民姦太祖使諸州郡大市銅兩雍本有炭字會晏駕事寢永明八年俊啟世祖曰南廣郡界蒙山下有城名蒙城可二頃地有燒鑪四所高一丈廣一丈五尺從蒙城渡水南百許步平地掘土深二尺得銅又有古掘銅坑深二丈并居宅處猶存鄧通南安人漢文帝賜嚴道縣銅山鑄錢今蒙山近青衣水南青衣在側竝是故秦之嚴道地青衣縣又改名漢嘉且蒙山去南安二百里案此必是通所鑄近喚蒙山獠出云甚可經略此議若立潤利無極

并獻蒙山銅一片又銅石一片平州鐵刀一口上從之遣使入蜀
鑄錢得千餘萬功費多乃止悛仍代始興王鑑爲持節監益寧二
州諸軍事益州刺史將軍如故悛旣藉舊恩尤能悅附人主承迎
權貴賓客閨房供費奢廣罷廣司二州傾資貢獻家無留儲在蜀
作金浴盆餘金物稱是罷任以本號還都欲獻之而世祖晏駕鬱
林新立悛奉獻減少鬱林知之諷有司收悛付廷尉將加誅戮高
宗啟救之見原禁錮終身雖見廢黜而賓客日至悛婦弟王法顯
同宋桂陽事遂啟別居終身不復見之海陵王卽位以白衣除兼
左民尙書尋除正高宗立加領驍騎將軍復故官駙馬都尉建武
二年虜主侵壽陽詔悛以本官假節出鎮巢湖遷散騎常侍右衛
將軍虜寇旣盛悛又以本官出屯新亭悛歷朝皆見恩遇太祖爲
鄱陽王鏘納悛妹爲妃高宗又爲晉安王寶義納悛女爲妃自此

連姻帝室王敬則反悛出守琅邪城轉五兵尙書領太子左衛率
未拜明帝崩東昏卽位改授散騎常侍領驍騎將軍尙書如故衛
送山陵卒年六十一贈太常常侍都尉如故謚曰敬

虞悛字景豫會稽餘姚人也祖嘯父晉左民尙書父秀之黃門郎
悛少而謹敕有至性秀之於都亾悛東出奔喪水漿不入口州辟
主簿建平王參軍尙書儀曹郎太子洗馬領軍長史正員郎累至
州治中別駕黃門郎初世祖始從官家尙貧薄悛推國士之眷數
相分與每行必呼上同載上甚德之昇明中世祖爲中軍引悛爲
諮議參軍遣吏部郎江謐持手書謂悛曰今因江吏郎有白以君
情顧意欲相屈建元初轉太子中庶子遷後軍長史領步兵校尉
鎮北長史監朔將軍南東海太守尋爲豫章內史將軍如故悛治
家富殖奴婢無游手雖在南土而會稽海味無不畢致焉遷輔國

將軍始興王長史平蠻校尉蜀郡太守轉司徒司馬將軍如故
善爲滋味和齊皆有方法豫章王嶷盛饌享賓謂悰曰今日有羞
寧有所遺不悰曰恨無黃頤何曾食疏所載也遷散騎常侍太
子右率永明八年大水百官戎服救太廟悰朱衣乘車鹵簿於宣
陽門外行馬內驅打人爲有司所奏見原上以悰布衣之舊從容
謂悰曰我當令卿復祖業轉侍中朝廷咸驚其美拜遷祠部尙書
世祖幸芳林園就悰求扁米糲悰獻糲及雜肴數十輦太官鼎味
不及也上就悰求諸飲食方悰祕不肯出上醉後體不快悰乃獻
醒酒鯖鮓一方而已出爲冠軍將軍車騎長史轉度支尙書領步
兵校尉鬱林立改領右軍將軍楊州大中正兼大匠卿起休安陵
於陵所受局下牛酒坐免官隆昌元年以白衣領職鬱林廢悰竊
歎曰王徐遂縛袴廢天子天下豈有此理邪延興元年復領右軍

明帝立恚稱疾不陪位帝使尙書令王晏賁廢立事示恚以恚舊人引參佐命恚謂晏曰主上聖明公卿勦力寧假朽老以匡贊惟新乎不敢聞命朝議欲糾之僕射徐孝嗣曰此亦古之遺直眾議乃止恚稱疾篤還東上表曰臣族陋海區身微稽土猥屬興運荷竊稠私徒越星紀終慙報荅衛蒼乖方抱疾嬰固寢瘵以來倏踰旬朔頻加醫治曾未瘳損惟此朽頓理難振復乞解所職盡療餘辰詔賜假百日轉給事中光祿大夫尋加正員常侍永元元年卒時年六十五恚性敦實與人知識必相存訪親疎皆有終始世以此稱之從弟衮矢志不仕王敬則反取衮監會稽郡而軍事悉付寒人張靈寶郡人攻郡殺靈寶衮以不豫事得全

胡諧之豫章南昌人也祖廉之治書侍御史父翼之州辟不就諧之初辟州從事主簿臨賀王國常侍員外郎撫軍行參軍晉熙王

安西中兵參軍南梁郡太守以器局見稱徙邵陵王南中郎中兵
領汝南太守不拜除射聲校尉州別駕除左軍將軍不拜仍除邵
陵王左軍諮議世祖頓盆城使諧之守尋陽城及爲江州復以諧
之爲別駕委以事任文惠太子鎮襄陽世祖以諧之心腹出爲北
中郎征虜司馬扶風太守爵關內侯在鎮毗贊甚有心力建元二
年還爲給事中驍騎將軍本州中正轉黃門郎領羽林監永明元
年轉守衛尉中正如故明年加給事中三年遷散騎常侍太子右
率五年遷左衛將軍加給事中中正如故諧之風形瓌潤善自居
處兼以舊恩見遇朝士多與交遊六年遷都官尙書上欲遷諧之
嘗從容謂諧之曰江州有幾侍中邪諧之荅曰近世唯有程道惠
一人而已上曰當令有二後以語尙書令王儉儉意更異乃以爲
太子中庶子領左衛率諧之兄謨之亾諧之上表曰臣私門罪釁

早備荼苦兄第三人共相撫鞠嬰孩抱疾得及成人長兄臣謹之
復早殞沒與亾第二兄臣謨之銜感家庭得蒙訓長情同極廕何
圖一旦奄見棄放吉凶分違不獲臨奉乞解所職詔不許改衛尉
中庶子如故八年上遣諧之率禁兵討巴東王子響於江陵兼長
史行事臺軍爲子響所敗有司奏免官權行軍事如故復爲衛尉
領中庶子本州中正諧之有識計每朝廷官缺及應遷代密量上
所用人皆如其言虞棕以此稱服之十年轉度支尙書領衛尉明
年卒時年五十一贈右將軍豫州刺史謚曰肅

史臣曰送錢羸兩言此無忘一筭之懷報以都尉千金可失貴在
人心夫謹而信汎愛眾其爲利也博矣況乎先覺潛龍結厚於布
素隨才致位理固然也

贊曰到藉豪華晚懷虛素虞生富厚侈不違度劉實朝交胡乃蕃

故頡頏亮采康衢騁步

南齊書卷三十七

列傳第十八